

Hari Terbuka UMP sebar maklumat pengajian tinggi terhadap masyarakat



Kuantan, 10 Mac - Universiti yang digambarkan sebagai sekolah pengajian sejagat (school of universal learning) sebenarnya mendukung peranan dan obligasi yang lebih besar yang bukan sahaja sebagai gedung ilmu pengetahuan malahan mempunyai dimensi yang lebih luas dan merujuk kepada proses penyebaran. Pengetahuan bukan sahaja kepada komuniti sesebuah universiti, tetapi tidak kurang pentingnya juga, penyebaran pengetahuan kepada masyarakat.

Naib Canselor UMP, Profesor Dato' Dr. Daing Nasir Ibrahim berkata, menyedari bahawa fungsi sebenarnya lebih bersifat satu obligasi berbanding rekreatif, apakah lagi dalam konteks kewujudannya sebagai sebuah universiti awam (UA), maka UMP memandang serius usaha merealisasikan pendemokrasian pendidikan dengan menampilkan Universiti ini ke tengah masyarakat.

"Dengan pelancaran Pelan Pembangunan Pendidikan Malaysia (Pendidikan Tinggi) 2015-2025 tidak lama lagi, komitmen sosial universiti terhadap masyarakat semakin diberi penekanan sebagai agenda penting yang perlu dilaksanakan di universiti ini."

"Masyarakat umum kini merupakan sebahagian daripada pemegang taruh dan kumpulan sasar yang memerlukan perhatian strategik universiti. Justeru, komitmen sosial berkaitan penyebaran pengetahuan kepada kelompok ini perlu diberikan acuan khusus yang realistik dan praktikal bagi memastikan mesej utamanya dapat disampaikan dengan berkesan, sama ada secara formal atau informal," ujar Dato' Dr Daing Nasir semasa menyampaikan ucapan sempena Majlis Perasmian Hari Terbuka UMP dan Penyampaian Hadiah CITREx 2015 hari ini.

Katanya, penganjuran Hari Terbuka ini adalah antara inisiatif UMP untuk memasyarakatkan Universiti ini melalui saluran yang formal yang dikombinasikan dengan kaedah penyebaran maklumat dan pengetahuan secara informal. Ianya terdiri daripada lima komponen utamanya iaitu Creation, Innovation, Technology & Research Exposition (CITREx), Karnival Mahabbah, Academic Showcase, Karnival Bahasa dan Kebudayaan Cina serta Persembahan Istimewa menjadikan Hari Terbuka UMP 2015 sebuah acara yang bersifat inklusif dan sesuai untuk semua peringkat masyarakat.



Sementara itu, Timbalan Naib Canselor (Penyelidikan dan Inovasi), Profesor Dr. Mashitah Mohd. Yusoff berkata, bersesuaian dengan pengumuman keputusan Sijil Pelajaran Malaysia (SPM) dan Sijil Tinggi Pelajaran Malaysia (STPM) baru-baru ini, ianya memberi peluang kepada bakal calon pelajar dan ibu bapa untuk mendapatkan maklumat pengajian.

Dalam pada itu, sebanyak 300 hasil penyelidikan Universiti Malaysia Pahang (UMP) dipamerkan dalam Pertandingan Reka Cipta, Kreatif dan Inovasi (CITREx) untuk dikongsi bersama masyarakat berjaya. Daripada jumlah tersebut sebanyak 66 pingat emas, 137 perak dan 79 pingat dianugerahkan kepada penyelidik yang berlangsung di Kompleks Sukan UMP Gambang bersempena Hari Terbuka UMP yang diadakan dua hari sejak semalam. Pengunjung dapat saksikan sendiri

penghasilan projek-projek penyelidikan yang mengenangkan elemen kepakaran dan kreativiti penyelidik melibatkan 183 staf dan 117 pelajar di universiti ini dipamerkan pada Hari Terbuka UMP ini.

Selain melawat pameran pengunjung berpeluang melawat makmal berpusat serta sistem pengajaran dan pembelajaran program pengajian di UMP yang menawarkan program-program di semua peringkat pengajian bermula dari Diploma, Sarjana Muda sehingga ke peringkat lebih tinggi seperti Sarjana (Master) dan Ijazah Kedoktoran.

Antara lain yang menjadi tarikan adalah kunjungan ikon dakwah, Ustaz Don Daniyal yang berpeluang bertemu dengan warga UMP dalam Program Sirah Rasul, Program Saintis Muda dan Fun Learning English.

Bersempena dengan itu turut berlangsung penganjuran Karnival Mahabbah anjuran bersama Pusat Islam dan Pembangunan Insan (PIMPIN) dan Karnival Bahasa dan Kebudayaan Cina dengan sokongan Pusat Bahasa Moden dan Sains Kemanusiaan (PBMSK).

Memeriahkan majlis perasmian adalah persembahan kebudayaan pelajar dari Yamaguchi Universiti Japan yang sedang mengikuti program mobiliti di UMP. Begitu juga dengan persembahan "tarian perang" yang berjaya menarik perhatian ramai. Pasukan seramai 33 anggota ini terdiri daripada batallion Pertama Rejimen 505 askar wataniah yang diketuai oleh Perajurit Muda Muhammad Eiddil Firdaus. Tarian ini adalah salah satu tarian semangat yang menonjolkan ciri-ciri keberanian, keseragaman dan disiplin tinggi sesuatu pasukan.

Dalam majlis ini Dato' Dr. Daing Nasir turut menyampaikan anugerah kepada pemenang pingat emas dan anugerah khas disampaikan oleh Syed Mohamad Hamzah Al-Junid. Bagi Anugerah Teknologi Hijau dimenangi oleh Dr. Chong Kwok Feng dan Pemenang Terbaik (staf) dinobatkan kepada Dr. Nina Suhait Azmi. Manakala bagi pelajar adalah Anugerah Impak Sosial dimenangi oleh Nur Lyana Zolkifli dan Anugerah Ciptaan Kreatif dimenangi oleh Mohd. Irshad Shafiq Md. Zamri serta Pemenang Terbaik (Pelajar) dianugerahkan kepada Nurul Adilah Rosnan.

Hadir sama dalam majlis perasmian Hari Terbuka adalah ahli Lembaga Pengarah UMP, Syed Mohamad Hamzah Al-Junid Syed Abdul Rahman, Profesor Ir. Dr. Hassan Ibrahim, Timbalan Naib Canselor (Hal Ehwal Pelajar dan Alumni), Profesor Dato' Dr. Yuserrie Zainuddin, Pemangku Pendaftar, Abd. Rahman hj. Safie dan Dekan Penyelidikan yang merupakan Pengerusi CITREx, Profesor Dr. Kamal Zuhairi Zamli.



Disediakan Unit Perhubungan Awam, Bahagian Komunikasi Korporat PNC

Posted By : SITI SARAH BINTI MOHAMAD RAJIMI Date Posted : 10-03-2015, 17:09:01